

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Kalaallit Nunaata Nunavullu allaffissornikkut politikikkullu
suleqatigiinnerulersinnaanerannut periarfissat pillugit kiisalu
niueqatigiinnerulersinnaanermut periarfissat pillugit nassuiaasiornissamik Naalakkersuisut
peqquneqarnissaannik Inatsisartut aalajangiiffigisassaattut siunnersuut.**
(Inatsisartunut ilaasortaq Doris Jakobsen, Siumut)

Tunngavilersuut:

Nunavummiullu naggueqatigiittut kulturikkut attaveqaativut annertoorejussuupput, kisiannili politikikkut, allaffissornikkut niuernikkullu suleqatigiinnerput annertugisassaanani.

Pissutsit arlallit ersersippaat annertunerusumik qaninnerusumillu Nunavummiullu suleqatigiinnissarput pisariaqartoq, soorlu aatsitassarsiornikkut ineriartorneq eqqarsaatigalugu, taamaammat Nunavummiunik qaninnerusumik suleqateqarnissap anguniarnissaanut maanna piffissannortoq isumaqarpunga.

Nunavummiunilli suleqateqarnitta annertusarnissaanut sumik tunngaveqarnissatta ersarlunnera nassuerutigisariaqarpoq, arlaleriarlunimi suleqatigiinnerunissaq eqqarsaatigalugu misiliisoqartarsimagaluarani. Niueqatigiinnerulernissamulli periarfissat annertunerusumik sulis misissuiffigineqartariaqarput.

Taamaammat Naalakkersuisut suliaq pillugu nassuiaasiortariaqartut isumaqarpunga. Nassuiaat taamaattoq Naalakkersuisunut Inatsisartunullu pingaaruteqartorujussuussaaq. Nassuiaat oqaluttuaannarani iliuusissanik, pilersaarutinik kiisalu suleriaqqinnissamut nutaanik toqqammavissanik imaqartariaqarpoq. Nassuiaat killiliisuunani siammasissuussariaqarpoq kaammattuutinillu aamma imaqartariaqarluni, siunissami politikikkut sulinissatsinni atorsinnaasatsinnik piviusunnortissinnaasatsinnillu.

Ukiuni 1000-ilikkaani Nunavummiullu ataqatigiinnerput eqqarsaatigalugu qaninnerusumik suleqatigiinnissarput avaqqunneqarsinnaanngitsutut isigigakku taamatut suliniuteqarnissaq pisariaqartoq isumaqarpunga.

Taamatut suliniuteqarneq siunissami Nunavummiunik annertunerusumik suleqarnissatsinnut niueqateqarnerulernissatsinnullu sinaakkusiissaaq, tamannalu suleqatigiinneq ingerlallualerpat qanoq ililluta naggueqativut allat suleqatiginerulernissaat nalilersorsinnaalissavarput.

Siunnersuutip pisortanut aningaasaqarnikkut allaffissornikkullu kinguneqaatissai

Nassuiaammik suliaqarneq Nunanut Allanut Pisortaqarfimmit ingerlanneqartussaasorinarpoq, tassanilu sulisup ataatsip piffissaq tamakkerlugu tamatuminna suliaqarnissaa

avaqqunneqarsinnaasorinangilaq, suliamimi misissuinerit, isumasiuinerit il.il. amerlasuut pisariaqassammata. Allatut oqaatigalugu tamanna Namminersorlutik Oqartussanut ukiumut 500.000 kr.-nit missaanni allaffissornikkut aningaasartuuteqarnerunermik kinguneqassaaq.

Naalackersuisut akissuteqaamminni aningaasartuutip taassuma qanoq matussuserneqarnissaanut siunnersuummik saqqummiussissasut naatsorsuutigaara, taamaaliornikkut Inatsisartut Nunatta Karsiata aningaasartuutaanik isertitaanillu oqimaaqatigiissitsinissamik anguniagaat attatiinnarneqassammat.

Siunnersuutip namminersortunut allaffissornikkut aningaasaqarnikkullu kinguneqaatissai
Soqanngilaq.

Siunnersuutip innuttaasunut allaffissornikkut aningaasaqarnikkullu kinguneqaatissai
Soqanngilaq